

十二月癸巳朔弘文館副提學蔡無擇等上劄曰宋世珩職秉史筆咫尺天顏敢懷陰譎謀掩世續兇邪之迹非但故自泯實惡人直書至於色見不平此豈止為一世續地素蓄邪念臨事自著所謂邪論有自者安知非此等人輩也長邪有因其源宜究值此機箸當戒滔天伏願殿下益軫遠慮明示好惡永絕根柢荅曰世珩事誠如是則至為無狀時方推之未見其招辭也觀趙德壽之招世珩以試官所不啓之辭不當書試官之名使不書而已世續所失則不禁書云必觀其所供可知也史臣曰羅世續對策課次之時與檢閱趙德壽俱入侍以其記事之際有沒實之跡故司諫院請推鞠世珩初非護世續也記事日次偶與之相錯德壽揣知時議欲罪世續覲因其會謀欲諂附以世珩日記之錯故播於人使之傳聞於臺諫承旨李任亦許沆之黨聞而轉囑故有此啓云非但此也上在潛邸世珩之父演孫為師傅幼穉之時亦與之同侍故上亦未之忘有時通問沆輩慮其奸狀由此得達尤忌之常欲陷害無隙可乘世續亦湖南人同在一道跡似親比故驅比陷之其為計譎且巧矣且世珩見敗德壽之門相賀曰未久當選入玉堂云世珩之敗專由德壽也○夜巽方艮方有氣如火○甲午下宋世珩所供單